

四庫全書

集部

欽定四庫全書

皇甫司勳集卷九

明 皇甫汈 撰

樂府

乘法駕

乘法駕者正德壬午武宗晏駕太宗伯毛澄奉
昭聖皇太后懿旨恭迎興王繼序即天子位也
當漢朱鷺

乘法駕出潛邸辭蘭坂臻楓陛握乾符奉慈旨橋中傾
碣呈字從臣觀稽首喜應帝期稱天子泰階升更化始
陋代來劣春起

乘法駕曲凡十六句句三字

釐廟制

釐廟制者嘉靖甲申追封皇考獻皇帝越數歲
九廟成也當漢思悲翁

典禮成四海謚享祀裡九廟翼考明堂筵太室獻皇躋

烈祖匹故鬼小幽靈假詠孝思歆明德

釐廟制曲凡十二句句三字

秩郊裡

秩郊裡者歲庚寅上可給事中夏言議創建四郊是歲日南至肇祀園丘也當漢艾如張

壇峙準圓方神祇奠南北夕郎奏既俞春卿議僉集睿想字筮從鴻圖表景測管燎迎初陽寅威練嘉日裸獻戾上公參乘簡元戚八駿夾電馳六龍戴星出天路抗旌

旄雲門間琴瑟殷薦升紫煙告成瘞蒼壁齊幄肅華班
旋塗厲清蹕靈貺展斯今仁孝光自昔

秩郊裡曲凡二十句句五字

歲皇史

歲皇史者歲乙未上命考古金匱石室之制以
藏書寶祖訓也當漢上之回

歲皇史丞帝籍金為匱石為室籤彙緝細部甲乙通文
華克武庫簡鴻儒讐豕誤於萬斯年守之錮

宸皇史曲凡十句其八句句三字二句句七字

展陵

展陵者歲丙申上以壽陵之役巡遊昌平臣為
都水使者除道西山也當漢翁離

帝眷園寢謁款丘陵馳道旦築行殿宵營巨帷成屋列
幔為城般雲謝巧周日非靈乾行玉輦坤御金輿六宮
婉從萬國賓趨鑾鈴響逋環佩聲徐五臣供帳百辟燕
醕朱明司辰清和肇節草樹蒙恩禽魚騰悅周歷皇畿

軫茲民業遐攬邊關洪思祖烈去遵鸞輅歸泛龍舟山

開陽翠

嶺名

川效安流

源出固安

柔情並暢睿藻揚休枚朔第

頌翊贊王猷

展陵曲九三十二句句四字

思舊邦

思舊邦者歲己亥上以章聖皇太后喪卜宅原

陵駕幸承天臣左遷黃州獲預從事也當漢戰

城南

南巡紀臚岳東幸緬懷豐白水循往轍丹陵訪故宮江
漢眺吾楚霜露愴宸衷電奔翼八駿雲興扈六龍不有
居者誰監國皇儲旦截馳道出翟相行邊細柳中顧公
鎖鑰青門北晝發邯鄲道夜渡黃河湄軍容肅肅間官
儀豹尾後載班姬隨衛火弗戢漳流半湮憲臣褫爵服
邦侯械以徇旌旗蔽日指樊城簫管具舉疊金鉦父老
稽首遮道迎椎牛置酒宴鎬京山川遍喜色禽鳥遞歡
聲闢朱閣掃青室思履綦存社席齋心望祀純德山名間

周爰園寢悽天顏詔發郢門邁燕關格祖特告鑾輿還
思舊邦曲九三十二句其十四句句五字十二
句句七字二句句四字四句句三字

海波平

海波平者倭夷間釁辛壬癸甲殆無寧歲越丙
辰司馬胡宗憲受命與司空趙文華盪平之繫
王直俘麻徐等奏功太廟也當漢將進酒

島夷日本稱最雄髡首駢拇炯兩瞳東舟截險洪濤中

跳梁若蝶聚若蜂揭竿烈炬耀日紅攻城掠邑誰嬰鋒
紅女休織田無農帝命祀海惟司空授脈秉鉞有胡公
狼兵苗卒集江東夜縱巨艦突蒙衝俘海繫直奏虜功
兔窮鳥盡艱厥終

海波平曲凡十三句句七字

更極

更極者歲戊午三殿災帝命新之更奉天為皇
極華蓋為中極謹身為建極也當漢有所思

三殿災雙闕燎天子避寢厭勝以禱朝右个御西清玉
食有減金懸無聲誰其梓慎窺大庭流烏化雀將焉徵
除舊布新承天意司空飭材俾壯麗宅中建極欽哉從

事

更極曲凡十三句其四句句三字六句句四字
四句句七字

遣仙使

遣仙使者歲癸亥上慕神仙之術遣御史王大

任姜做分道采訪冀遇異人授祕書求長生不
死也當漢邕熙

周穆窮寰宇漢武慕蓬壺東生遊調笑西母譙懽顛
既屢纁帶丰亦枉蒲車緩齡韜上藥御氣祕真符臺端
兩侍御將命發天都齊梁歷南楚既越盡東吳姓名河
上隱物色市中趨金簡探綠籍瓊笈訪丹書曾未三載
還幸與百年俱築館理上士授繁出中厨行聞避驄馬
歸見館銀魚稽首願玉體壽考永無虞

遣仙使曲凡二十四句句五字

考芝宮

考芝宮者歲乙丑獻廟產芝瑤光映室乃建玉
芝宮以時致享昭孝感也當漢太和

河清社鳴誕聖人握符纘歷靡端不臻天垂卿雲景星
現地出醴泉澤曼衍菓木六穗麥兩岐嘉瓜並蒂連理
枝三足軒翥肉角嬉龜鹿雀兔咸素姿包匭驛貢賚四
馳芝草凝祥處處生獻廟忽產屋之楹瑤光瑩潔秀九

堊銅池芝房惡足稱帝命作宮時享以報子孫千億昌
胤允紹

考芝宮曲凡十八句其十二句句七字六句六
四字

皇甫司勳集卷九

欽定四庫全書

皇甫司勳集卷十

明 皇甫汈 撰

樂府

芳樹

芳樹九華邊
春風一度妍
飄香承輦路
弄影向甘泉
綴葉紛千種
濯枝幸萬年
不作淮南桂
空山徒棄捐

臨高臺

高臺望不極臨竚意何窮
茂苑花為苑吳宮錦作宮管
絃虛夜月羅綺罷春風
獨惜烏啼處猶聞曲怨中

有所思

春風吹繡戶明月鑿羅幃
同心阻芳訊千里悵清暉
歌絃塵屢積舞衣香漸微
別有關情處梁間雙鶯飛

巫山高

蜀道連巴水巫山接楚陽
情來為雲雨愁起見瀟湘
楓葉吟秋早猿聲入夜長
何能降神女鬢髻夢裏王

隴頭水

隴坂去何長隴水復湯湯咽處堪啼淚流時更斷腸三
秋邊草白萬里戍雲黃辛苦交河使西來憶故鄉

折楊柳

不見隋堤柳長條大道間絲陰流水去帶影逐春還妬
眉銷翠黛聽笛損朱顏日暮行人盡思君可重攀

梅花落

早見梅花落江南春未遲如何上苑葉不似故園枝影

怯臨粧夜香憐
逐吹時無人問消息
獨自寄相思

關山月

故園千里月流照
入秦關弓影同
看曲刀頭未卜還迷
雲度容與映水咽潺湲
莫遣青樓去摧殘
少婦顏

邯鄲行

寶馬邯鄲道
金裝遊俠過
一朝罷歌舞
千秋傷綺羅
臺榭風花盡
郊原煙草多
客心將夜月
滾滾向漳河

昭君怨

含悲辭鳳掖結束事龍庭環珮從茲遠琵琶詎忍聽泣
將蛾眉恨仰視旄頭星獨有長門草猶向夜臺青

長門怨

長門永夜幽團扇早迎秋望幸非同輦含情是倚樓容
華翻易歇恩寵最難收君自觀魚樂寧知妾淚流

冬宵引

冬宵不易曙耿耿朔風淒沙鴈寒猶起城烏半未棲孤
舟泊江上征馬渡遠西豈但金閨裏能添玉筋啼

烏夜啼

長樂宮中秋夜長美人新得幸君王別館不愁金作屋
曲池無羨玉為梁門前數報公車過樓下時聞脂粉香
總是啼烏聲轉切歡娛那解曲淒涼

江南曲

錦帆西去遶橫塘畫舸攜來悉粉粧旭日籠光流彩艷
晚雲停雨淨蘭芳飛絲帶蝶粘羅幌吹浪遊魚戲羽觴
自是江南好行樂採蓮到處棹歌長

春江花月夜

空負芳樓約，愁逢江上春。
月華天外潔，花影浪中新。
詎是沈珠浦，將非濯錦津。
爭言蘭作舫，復擬桂為輪。
圓缺同今夕，飄零異昔辰。
關山猶自隔，攀折贈何因。

擬中婦織流黃

金閨方永夜，翠袖理殘機。
燈花斜落鏡，月光低鑒幃。
寸心共絲斷，雙淚與梭揮。
作伴除蛩響，驚眠惟鴈飛。
織就當窗素，裁為遠道衣。
徒令芳訊達，不及早旋歸。

擬伯勞東飛歌二首

蛺蝶雙飛燕並棲秦樓燕市花成溪誰家玉人當戶窺
含羞歛笑橫波馳寶髻珠鈿明月光羅幃翠帳秋夜長
秀顏皓齒纔十五時向芳筵作歌舞雀臺靈寢生暮雲
空留可憐猶為君

夜鳥悲啼朝雉鳴青琴絳樹無限情誰家臨鏡總新粧
雲鬟刻飾出意長翠屏錦帳花連理洞房仙居暗香起
年幾二七奉下陳光彩流盼姿絕倫春風東來吹落花

綠窗可憐虛歲華

自君之出矣二首

自君之出矣坐令衣帶緩思君如懸蘿纏絲不能斷
自君之出矣何處不相思在物願為筋君前無隻時

岸花臨水發三首

止水如瑤鏡繁花似寶粧為憐影相照詎是意相忘
江疑濯錦處花似浣紗人莫逐東流去還待上陽春
名園紛幾許臨水獨如何所思迷望石欲往會淩波

賦得處處春雲生

春色藹無際朝雲最可憐
金枝紛映帶玉葉綴聯翩
弄影交疏裏含情飛蓋邊
長安遥向日何處奉非烟

烏散餘花落

春來啼鳥伴相逐
百花中棲處迷深綠
飛時帶淺紅
祇惜香露羽非闕
嬌惹風回看意不盡
猶自戀芳叢

空梁落燕泥

金閨春色早玉闌芳信賒
人歸鬢後燕淚盡每先花戶

暗香沉積梁低舞影斜不作雙飛去東隣王謝家

邊馬有歸心

應瑞來宛國銜恩入漢家邊兵犯燕塞驃騎出龍沙為
報千金顧寧辭萬里賒蹄穿朝踏雪聲斷夜嘶笳逐北
名空在征南賞未加詎隨班定遠生作玉門嗟

夏日湖泛作採蓮曲

雀舫疑杯度虹橋似帶縈湖光湛處全無暑雲氣浮時
半有晴此時流水歌聲起此日採蓮殊未已帆迴櫓轉

逐橋斜樹裏溪邊是妾家翠裙妬殺風前葉紅粉嬌於
水上花花開花落獨含愁人去人來不斷遊玉尊醉霞
何惜晚瑤華零露易驚秋秋露蒹葭沒秋水芙蓉歇菱
鏡年年非故顏荷衣夜夜空明月

門有車馬客行贈李少卿

驅車吳趨市被服一何妍叩閣懷敝刺云是李青蓮家
住齊東里喬自隴西傳觀道汶泗上探竒秦岱間舉手
捫星漢躡足凌雲煙昔拜符璽郎侍從清華班姱行遭

時妬修名為世牽一麾佐宣守理案有餘閑試問長江
練日對謝公懸傾蓋惠良覲振袖發瑤編瑩如夜光儷
粲若春葩鮮且勿出關去邀君著五千

皇清司勳集卷十

欽定四庫全書

皇甫司勳集卷十一

明 皇甫汈 撰

七言古詩

桐君山題贈盧職方江右典試

朝登桐君山下有澄江四遶流潺湲暮謁桐君祠上有
古木一望懸參差昔人採秀山之巔桐蔭未徙凌雲仙
瓊漿石髓世不識丹崖翠壑空年年越鄉自古窮嘉麗

弭節停輶幾留滯嚴陵瀨靜秋漲沈香鑪峯寒暝煙翳
盧君揮斤宇內游昨來奉使潯陽舟直躡盧峯探奠服
又從瀑布挹飛流江山能使才華盛况接朱繩與青鏡
登覽何如司馬雄文章自是歐陽正君鳴玉珮上金鑿
桐葉聲銷日已殘鐘鼎山林緣底事不須回首憶江干

送尚醫陳通政南還

東風吹花駐芳甸都門此日開郊宴車馬爭來四岸聞
冠裳自結傾城餞借問餞者云是誰為儒十載方為醫

逃名未得潛廬嶽授訣應曾飲上池少年寵食王官祿
白首歸田嘆知足磬折非辭彭澤腰倦飛欲振祁奚躅
由來出處本難同珮玉銀金仕已雄君不見男兒讀書
破萬卷至今落落猶泥中

夢二生行

陳與言
周詩

憶昔同心友陳生為之首更憶投分交周子逸且豪陳
生竒余言在耳青雲置身果如此惜爾早世不慙遺九
淵慰爾應無悲周子知我雖相新膠漆不異我與陳睥

睨一世爾自許落落誰忘竹亭語吁嗟二子來夢中鬢
毛不改容顏同風塵慘愴旅服改燈火蕩漾芳尊空綈
袍猶戀當年別覺後使我心悲咽二子一死嗟一生我
欲於子知交情

長沙行送胡子

胡子堯時以給事謫長沙簿同事者劉安也

賈生昔被長沙謫湘水千年動顏色弔古空勞憶芷蘭
世途久已生荆棘當今天子稱聖君論思豈復如漢文
垂裳穆穆日南向銳情稽古非謙讓直氣常懸青瑣間

愁雲更鬱烏臺上胡郎胸中書萬言夕方拜官朝叩閣
劉向況有五行傳挺身悟主爭繩愆即今亦有長沙行
此去應知聖主情早晚定膺宣室召肯使人徒說賈生

長安十六夜歌

長安十六夜如洗千門萬戶煙花裏閨中少婦夜出遊
陌上行人忽成市粲粲珠鈿映月來翩翩翠袖搏風起
風前月下逞嬌姿愛惜春花能幾時無那萸萸先落莢
只愁楊柳漸飛絲遊絲飛入黃金地撲牖穿簾果何意

鳳甸常懸禱雪憂，鼇山久罷觀燈戲。燈光却照五侯家，
列炬然膏滿絳紗。豈謂鋪金能作埒，亦知剪綵易為花。
銀花火樹開佳節，遂令觀者相環列。霍氏門牆有後塵，
魏其池館空前轍。淒涼往事已為陳，恨殺懷春似玉人。
莫賤蘭房今夜女，故多椒掖舊時親。明璫盡結瓊瑤麗，
袿服爭看錦繡新。襦曳蒞時香散靄，襪移蓮處暗生塵。
香塵冉冉隨芳步，共道非煙亦非霧。馳目還憐梁下期，
冶容又為桑間誤。閨閣今已羨如雲，夙夜誰當畏行露。

鐵鎖遙開天上橋
漸臺何必待符招
二南倘被翹薪化
四海應回廣髻謠

長安行贈陳子克脩

長安昔日花如綺
走馬看花事已矣
吁嗟歲月無停晷
回首又值春風起
陳生久客長安裏
按劍誓將歸故里
嗚呼陳生歸且止
古來晚暮多豪士
桑弧蓬矢志四方
區區肯效兒女子
君不見今燕臺樂劇不賓胡為哉
他年自識公孫對
暫時豈為劉黃哀
駟馬車黃金印他時

乘此佩之去花柳迎人故山處

憶昨行贈夏都諫

憶昨天王下手較辦方經野開蠶室稽古真卑漢未遑
銳情直所周無逸王假還宜照日中聖作何須守明述
君不見洄沿川水映柔桑窈窕郊宮護棘牆玄黃欲獻
夫人蘭朱綠聊為公子裳又不見青壇翠幙藹中田縹
駕新從此上旋遂使鯨魚呈瑞象頓令銅雀頌豐年嗚
呼天子勸耕后勸織王業艱難果誰測七月重歌姬旦

詩一朝實賴黃門力嗚呼今之黃門古遺直抗言朝宇
生顏色馬客逢君時已來宣侯吹噓到上台北郊更起
匡衡論前席遙憐賈誼才男兒志於立功慎自擅掀天
揭日奔雷電退食方依青瑣闈傳宣直至黃金殿稽首
親承玉語溫威顏咫尺君王面書錫絲綸龍鳳蟠幣頒
錦繡雲霞炫紆紫圍金未足榮致君堯舜應爭羨嗚呼
致君堯舜應爭羨

玉河怨

玉河西堤柳青色含煙弄霧金門側水接昆池波欲流
日升翰苑光先得日光照耀九龍開萬騎千官天上回
仗影迴迷飛絮去珮聲遙雜嘯鶯來鶯轉皇州春漸暮
曳珮鳴珂漫如故物態那禁鱗運催人情總為繁華誤
一夜秋風歇衆芳萍水悠悠枉斷腸不見曲眉顰舊黛
祇聞羌笛怨斜陽

題魏時苗返犢圖

宋趙子昂所繪
評事應果所藏

君不見盜泉水不飲長行寧渴死夷齊共餓魯連恥古

來違節皆如此漢室猶能重禮教茫茫海內徵廉士火
德下衰風斯靡昊穹垢氛蔽邈迤魏亦有賢曰時子激
揚異代仍興起憶昔乘車令壽春牝牛自足隨吾貧車
來既空去何有迢迢不染民間塵攢非爾駢育爾土安
用汗我車傍輪褰裳杖杖走相送提兒媚婦多苦辛趙
公本是清白者睠此丹青為誰寫應子收藏今幾年拂
拭素練生雲煙操持宣羨鬱林石慷慨不但山陰錢賦
魚毀象爾何者常使冰壺照眼前

青州行送褚寶令臨朐

君不見茫茫青州本東土呂公封齊姬封魯海岱何如
四塞雄萊夷自是千年撫方輿星粲子雲箴大國風存
史遷語五月報政齊何神古來平易俱近民天子上嘉
更下樂先王之道非沈淪褚子夙著三都賦昨奏明堂
比韶護天子勞賢眷爾才暫試臨朐豈遲暮芳桃不羨
河陽花甘棠欲滿營丘樹挽今之齊仍為周異代絃歌
盡如故烏臺仙吏青瑣郎有時待爾鳴朝陽隴上曾經

笑鷄雀棘林豈足棲
鷺風迨迨東征出
霄漢相送且覆
清秋觴

天風行

有客騎驢何處來
高巾短褐俱塵埃
自言今晨萬乘出
道傍親睹鑿與迴
龍旂遠拂瑤壇降
鳳扇徐承金殿開
文工武僚皆肅穆
秉笏鳴珮趨蓬萊
先生落落何為者
抱書獨卧蓬蒿下
長卿猶陪上林從
子雲亦扈甘泉駕
君不見邇來白晝天
風高沙飛礫走人
叫號出門舉步

金匱要略卷十一
動齟齬何如閉門與子且覆杯中醪

明禋歌送朱子隆禧捧詔南邦

天王玉詔宣金鑿黃章粲爛龍麟蟠行人之官捧之出
輜軒直下青雲端惟時朱子意氣盛昨方拜職今拜命
長卿能無諭蜀文仲宣亦有浮淮詠君不見帝主龍飛
今九年夢寐堯舜遑遑焉稽古真卑漢文讓陳疏更遇
匡衡賢聖謨宣俟卿士協况爾龜筮開其先遂使北郊
祀地南祀天朝日夕月東西偏儀文匪徒守宋未制作

直欲凌周前辨方畫野此經始勿亟還應庶民子圓立
峩峩睿想建帷城日射瑤壇紫君行要俾萬姓知王者
明裡本為爾

長安二月雪後歌

二月欲破春過半六翼猶自飛零亂塵氛四野鬱昏霾
瓊瑤一夜堆璀璨沙柳含煙未吐絲宮花壓雪空成幔
甘澤應懸畎畝思凝寒更起衣裳嘆天意從來未可諶
物華奈爾無由翫君不見寶露新傳楚國來銅盤捧出

龍顏開齋心萬乘躬郊祀稽首千官進壽杯嗚呼古有
災祥說昨冬胡露今胡雪博極真憐劉向才條陳詎職
匡衡訣尚賴金門變理臣好調玉燭太平春朝中自是
浴虞嶽海內何須憂杞人

塞下曲壬辰仲冬許中丞畧地紫荊賦此寄之

旆旌悠悠班馬鳴中丞十月行紫荊易水冰堅夜可渡
陰山雪積雲為平毳幕遙懸徼外落烽火直接單于城
候城獵獵天風高墮指裂面吹如刀草宿寒侵壯士鐵

露下霑濕將軍袍袍袖音書字不減蘭闈玉筍空啼血
朝廷本望樹功勳關塞那應怨離別天子臨軒試三輔
中丞秉鉞巡行伍落日籌邊上封事衝霜與卒同甘苦
男兒龍額志封侯勒石須盡燕然頭羽書瀚海昨猶急
金繒通和非遠猷玄冬願挾諸士纒紫貂肯獨蒙輕裘
君不見在廷頗收文臣擅一范能令敵心戰別墅或校
謝安碁理案常披左氏傳鎖鑰由來重北門衣裳自是
垂南面此時月向隴頭明蘆聲吹入漢家營昭王臺上

中丞帳可使門無孺子纓

秋風嘆

秋風浙瀝秋露微為君今夜擣征衣
花從金素變鴈向玉關飛羽書未報捷
征夫何時歸總使君身貴寧知妾
顏非忍為麒麟閣棄捐鴛鴦幃

南粵行

南粵由來本受降置亭列障賜稱王
丹砂歲歲通勾漏白雉年年獻越裳
曾是金縉忘漢德也因玉帛阻炎荒

炎荒迢遙限疆土君王中葉恢英武校獵誰云漢武雄
安民不讓周文怒昆明習兵深鑿池細柳行營遠勞師
羽檄流星飛甲冑樓船橫海蔽旌旗樓船羽檄下續紛
刁斗銜枚處處聞甲冑夜開魚麗陣旌旗朝合虎賁軍
神謨不戰已威加陀王納款遂踰沙指顧泰山盟作礪
并吞瀚海化為家馬援功期勒銅柱捐之議寢棄珠崖
珠崖銅柱古如此瘴癘氛祲萬餘里奮身欲屠象郡城
膏血直濺龍門水始知陸賈善行成肯學張騫虛奉使

留滯周南望九重請纓天北恨無從六月凱旋歌薄伐
一朝書奏願登封

淮陰行

君不見王孫未遇釣淮陰相留一飯是恩深知已此心
懸白壁封侯他日報黃金黃金匪為薄聊自意所託
嗟蓐食兒挪揄覆羹鑊韓生將畧本多奇可憐猶受婦
人知若非仗劍從英主徒然執戟老明時

採蓮曲秋日經濟寧萬水曹招讌池亭作

朱英翠葉儼仙葩繡浦金塘特著花連漪江畔明秋水
的皜城邊綴晚霞晚霞秋水正芳時桂楫蘭舟處處移
舟移菡萏波間動櫂遶芙蓉鏡裏披本緣傾蓋追歡宴
翻作牽裳送別離夫君自是軒冕客不惜瑤尊永今夕
試問看花限北津何如折柳停南陌折柳思應長看花
愁更積醉君羅綺筵為君歌採蓮蓮花萬種出吳閭歲
歲年年狎景光此日荷風迎素扇此時蘿月照新粧可
憐共蒂邀同伴勿願飄蓬在異鄉濟上相逢華已暮菱

金華山人集卷十
歌一曲斷人腸

秋鴈篇寄故園兄弟

虬分銀箭夜鴈度玉關秋隨陽向蘭時依暖背蘆洲蘆
洲蘭時總堪棲霧裏霜前陣不迷避繳空聞來塞北傳
書幾見下遼西西去南來鳴噉噉顧侶攜羣更多少也
思映月集通宵也怕因風失清曉風飄折羽遂分行不
及迴翔在故鄉一枝自合同荆樹萬里徒嗟媿稻梁

使迴歌

詔命因山啟地藏珠丘卜在翠微陽黃圖翼翼千峯拱
玄灞悠悠一水長聖世有為昭有象王情無逸恤無疆
惟王制作紛何已土木之功從茲始別館離宮相蔽虧
複道迴軒亘迤邐獻節乘輶遣使臣徵材取木下江津
吳越錦帆懸子夜秦淮寶馬繫青春也知桐梓生南土
也知松柏稱嘉樹一朝際遇棟梁成萬年封植煙霞扈
自甘瓠落本無庸肯隨輪囷託先容夕向綺樓瞻五鳳
曉叩朱閣排九龍九龍金鎖玉闕開芙蓉新殿儼蓬萊

金一八八二
卷十一
橫汾初返巡遊駕宴鎬方行慶壽杯共言帝幸多仙從
漢武應憐臣朔來

早朝獻儀曹家兄

南去北來年屢換側望長安倚增嘆五雲還詔入金門
八月乘槎渡銀漢銀漢迢遙秋夜長玉河清淺映明光
却看濟濟夔龍會爭羨雙雙鴻鴈翔

結交篇贈張兵憲

昔奉輜軒使因參幕府前今承江海謫持贈結交篇交

情安可見翟門署貴賤金蘭更結此時心
瓊枝豈異當年面
旅迹徒嗟兩度來
世事那知一朝變
也悲昏夜眩明珠
却向西風泣團扇
相逢岐路已堪哀
況復相思隔楚臺
試問張華敬愛客
何如李白獨憐才
河干輟棹多容與
城隅張組屢徘徊
徘徊南浦意何長
見說東山召繡裳
却羨雙鳧入霄漢
為傳尺鯉到瀟湘

送張子還廣陵

張子別我黃鶴樓
飄然騎鶴歸揚州
駕言返吾初服去

安得為此斗粟留君不見嵇生疎散長卿慢不善希世
稱巧宦獻玉明時祇自悲投珠昏夜遭人盼聞說淮南
桂樹芳澄湖一曲似滄浪莫須北闕徵書下自許東山
隱興長

張明府送吳釀戲作短歌

君不見閭闔朱樓十二開酒旗高結綵雲隈誰家寶馬
非留住若箇金貂不換來吏部甕邊狂亦甚文君鑪前
嬌可哀此時新釀勞相贈此夕鄉心醉裏迴

皇甫司勳集卷十一

欽定四庫全書

皇甫司勳集卷十二

明 皇甫汈 撰

七言古詩

化蜀行送周子籲提學

使君結駟引華軒，抗旌西指靈關門。
衆賓引餞且莫起，聽我揚摧巴蜀始。
黃苗帝裔蔓本支，蠶叢魚鳧爰肇基。
儀兮城太啓都會，冰也疆理饒沃滋。
叔世漸革密促政。

晚蒞乃被中和詩置酒宴樂從禽荒卻卓餘風稱難治
銅梁玉壘靈氣開碧鷄金馬神降來貝錦黃潤產奇貨
木蘭丹青紛美材靈氣日以宣哲士日以繁相如作賦
準騷經君平著書道德鄰揚子深湛秘玄旨王生曄曄
流英聲使君夙齡瞻斧藻含章下帷劇幽討恭承嘉命
辭天庭奉揚文思振南表鑄人自有尼父術化俗更似
文翁造雅儒濟濟升君堂齊魯斷斷茲足紹錦官城外
錦江流浣花溪邊花可遊高樓結綺宛然在琴臺卜肆

今尚留馬蹄豈憚劍閣險猿聲忽報瞿塘秋瞿塘秋已
晚思君路方遠敷教向岷峨探奇到處過萬里欲識凌
雲思三峽遙聞流水歌

廣思行

長兄造思舊賦乃歌以廣之

美人奄忽委明艷冰心悅記芙蓉面麗魄香魂何所棲
婉態柔情獨不見青樓朱戶生網絲文軒綺窻虛履綦
誰家窈窕出新粧當筵一顧情內傷名姝絕代本無二

玉顏祇訝前身是歡笑千金歌舞場
 歛歛萬種悲悽地
 冶容髣髴已驚盼新聲靡曼復增嘆
 陳思總謂洛神奇
 漢武翻疑少君幻多情宋玉起獨立
 衆賓無言主鳴邑
 翠袖全迴燈下羞青衫半沾座中泣
 門前柳色慘江烟
 檻外飛花隔楚天請看今日勞相憶
 莫向他年留可憐
 昔日行贈許應元使君

昔日與君相別處越江一夜秋濤去
 今日與君相見時
 吳宮三月春風吹人生聚散何草草
 春來秋逝傷懷抱

轉盼流光安可知策足要津苦不早少年避世漢廷中
俛首潛郎畫省東不事簿書羞問馬空將詞賦擅雕蟲
賈生果遭絳侯妬汲孺亦被公孫怒謫去蒐銷湘水濱
歸來淚盡燕城墓敝廬蕭蕭落日曛高車門外過續紛
已掃松蘿謝逋客猶隨軒冕對夫君夫君倜儻青雲罷
奉節聊為蒼水使酌酒何關世上情論文且發囊中秘
白首相期在今猷榮名莫遣為身累君從北闕謁丹墀
余守南山偃桂枝詎堪玄度孤明月却照楊朱兩路歧

夏時對酒歌

春光奄忽朱明移華丹委謝柔綠滋白日幸長走苦熱
清夜雖短坐忘疲美人邀我入蘭室臨池伏檻待月出
左宦空嗟軒冕年間居忍負琴尊日萬物萍浮無定蹤
一身瓠落竟難容江邊冉冉老將至世上悠悠時未逢
文章自古俱寂寞富貴何如且行樂雲夢徒誇獻賦田
天祿終慙校書閣黃金為壘白玉漿朱絃錦瑟泛清商
若為勸飲須酩酊我為高歌生慨慷明月漸昇燭方滅

涼颼徐來纓欲絕莫愁殘夜已栖烏但恐先秋早鳴鳩
今辰行五月十二日先忌辰作

今辰何辰心煩傷無言竚立涕霑裳悠悠蒼天安可問
肅肅玄寢神如將憶昔承恩拜家慶初筵白髮雙相映
採蘭不顧尚書期及瓜每後君王命此時嘉賓四座
傾滿堂宴笑春風生繁絃促柱發雅奏白華朱萼敷鮮
英人事分明有代謝慶者在門弔在舍申伯虛傳崧嶽
靈方朔奄隨歲星化高臺垂雲為我陰密室含霜詎知

夏昔日千金獻壽人今翻上食總帷陳悲風南來少寧
樹頽波東逝不迴津以此思哀哀更泣亦知予告何嗟
及豈復殷勤杯酒歡空餘髣髴畫圖看黃門且念奉母
去清河欲誅痛才難

閻闔行贈朱大理

少年為儒不習吏天子試政謁廷尉耳剗刑書非所
堪手持法律了莫謂是時朱博材過人平反輕重稱絕
倫獻常八九中意指談每一二相開陳冉冉府中趨獨

久迢迢忽拜遐邦守萬里驅車仗此身一朝投劾遭多
口世事升沉安可知人生聚散更難期海內萍蹤各飄
轉天涯柳色幾相思我本與君同里閨十年不寄雲中
翰閭闔門前會面時把臂道故兩增歎自言彭澤早歸
來却笑平原尚羈宦看君遺世有高情失路何曾氣不
平薄暮乘舟入湖去似聞撫缶作秦聲

荅周山人惠鏡囊歌

山人以寶刀持贈司直家兄乃製古歌訓之奇鋒厲

鍔雖價重三鄉績，句雕章亦氣雄。百代所謂金錯英，瑤報施亦稱矣。間以鏡囊一枚餉僕，僕戲曰：物則細耳，才復劣焉。是故短歌微吟，不能長也。

我有古鏡字明月，愛惜相持走燕闕。少年被服方冶容，矯首勝冠正玄髮。此時明鏡炯無塵，一片銀華四座春。青鸞每開寶臺曙，丹鳳雙盤玉匣春。山精辟易不得近，嫫母羞窺何敢嗔。願葆明光虛室裏，絕勝冰壺與止水。察見淵魚似不祥，况復蛾眉最相忌。周郎解贈錦綺囊，

繩窮緘發迴龍光
誰家窈窕濯素手
當窻刺繡結衷腸
規形恰與美璧合
藻艷巧奪菱花妝
由來尚象乃成器
拜君佳貺感君意
姱行驚時亦易汙
神物深藏豈輕示
守黑須從老氏謨
用光却笑稽生累
與君結交肝膽見
世上紛紛盡如面
一朝慷慨愛已捐
萬金揮斥心能賤
皇生佩囊如佩韋
韜精理照承餘輝

觀唐太史吳門射歌

君從弱冠起明經
文藻爭先拔漢庭
蘭臺給劄因成草

石室細書屢殺青此日公車承寵渥詎言金馬棲方朔
昨來上疏批龍鱗不獨談經折八角翻疑君厭承明廬
詔令歸就碧山居減盡瘦圍憐沈約病多消渴類相如
隱姓潛行吳市東却求劍術想英風繫筑夜宿專諸館
袖錐朝過闔閭宮清秋獵騎平原上白日張侯矍圃中
左肘能教置杯水右手引弓輕發矢風前報道百葉穿
雲際驚看兩鴻死是時觀者愕相嚮我亦心雄氣增壯
灞亭醉尉苦莫嗔漁陽老將嗟推讓聖主同時最好文

諸賢幸廁從官羣那知好惡多更易况兼蹤跡有離分
公孫客館丘堪甚鄭莊推轂遂無聞但云海外求方士
更傳天上出將軍勿向長門奏辭賦請從遐塞勒功勲

林酒仙歌

君不見昔日林師東習禪常時乞食闔城邊牀前不學
維摩坐甕下翻同吏部眠從此市人皆識姓醉呼酒仙
歸每應通好何須法器貽相逢但遣香醪贈飲者家遭
雷電來延師秘呪不為災驅石遙從洞門至返風曾渡

太湖迴梅侯為郡有賢聲雲漢勞思濟衆生鉢內龍鳴
晨作雨錫邊虹見晚移晴君不見自古異人多變幻葛
陂神應偏能慣左慈却被世主嗔長房亦受諸魔患弟
子傳燈生道晤歷歷猶能語平素已知前是辟支身安
用親承刺史顧我歌酒仙爾試聽處世由來忌獨醒為
問六牙求證果因看萬物若浮萍嘯別虎溪攜策去莫
向羅天苦誦經

壬寅歲除歌

端居冉冉流光往事悠悠耿不忘擊劍總為行樂地
鬪鷄曾結少年場晚慕詩書才十五因耽文史三冬苦
夜見螢飛車氏囊朝看魚出萊蕪釜從此家園懶不窺
長無鄉曲譽相推且甘寂寂龍蛇卧安用區區燕雀知
一朝謁帝承明上不慣隨人走俗狀言將調笑恐侏儒
謂可優游取卿相轉盼今經二十年循跡誰知事不然
由來直道時方忌重以修能世豈憐浮湘賈誼空投賦
執戟揚雄獨守玄君不見朱雲四十始改節遠從博士

受易說逢時吐膽漢廷中
遶陛爭呼丹檻折又不見山
公四十起郡吏投傳羞為部
從事遇主遂廁三公間
總揆還稱百官治我却無聞
強度春官游減產久沈淪未
果官階能復祖非關
郎署可潛身坐驚芳歲
明朝過爛醉香醪勿重陳

送顧子懋涵應貢北上

尚書
璘子

古來江左多英烈
顧榮人望尤超絕
班生豈好紈袴間
公子能持布衣節
早年作賦思凌雲
同時幸遇聖明君

未果先容因狗監徒然落魄在鷄羣一朝起就賢良薦
却向金門請褐見橫經論難諸儒前夾陛惟聞帝稱善
此時折角動朝紳還須吐膽奏天人為語洛陽新進者
更誰得似晚平津

天津荅子安兄

別家五月渡江水棹拂炎雲入淮汜行殘六月臻衛流
涼颼一夕秋聲起眼中金闕已在望手持玉盃喜相向
聞道長安有狹斜明朝走馬踏晴沙莫將潞水橋邊柳

看作玄都觀裏花

天津對月歌

天津城外海潮生楊柳堤邊月正明岐路終朝堪下淚
關山此夜倍含情昨見光流金闕裏分明影傍瑤臺起
懷璧虛從上國來投珠莫向都門倚迢迢蘭槳旅人舟
寂寞羅幃思婦樓失寵翻憐圓似扇和光祇恨曲如鉤
自同烏鵲枝間戀那知蟾兔須臾變秉燭南皮尚雅游
飛蓋西園憶芳宴幾許清暉三五期爭得朱顏二八時

且共高陽縱飲去安用成都訪卜為

太平隄行

余兄子安並友蔡子本皆南移法曹而余亦淹
水部徃省家兄時一至焉既而出補越憲間因
蔡子徃者月僅再至耳蔡復考績北征經月不
一至也偶過茲地山色湖光宛然在目鴈行鳳
侶悵爾離羣延佇久之賦詩展

太平門外古崇隄嘉樹扶疎夾路垂負郭盡為芳草地

沿湖直遶白雲司當時王貢總仙才況是承恩北闕來
御史府中烏半宿尚書門下騎雙回青山幾度朝陵節
玄水曾流袂洛杯鳴珂再過平沙道問舍多為後來少
已看奏賦甘泉宮每憶傳詩臨海嶠驚心歲序易經春
舉目湖山宛自新含香不覩遊蘭客息影徒逢愛樹人
由來聚散皆無定欲寄相思那可因

送駕部王子督楚學

中興文運應圖開聲教遙知溥海迴共看濟濟多周士

更道彬彬悉楚材楚鄉今上龍飛地代來總是攀鱗起
里社鳴時河正清鑿輿幸後雲常紫騷壇屈宋本稱雄
誰為操斤向郢中明堂豈羨菁茅貢江漢先歌棫樸風
奉揚德化勞宸眷蜀郡王褒被嘉薦藻鑑曾推吏部郎
才華况屬瀛洲彦君不見伯樂不生良驥缺鍾期死後
朱絃絕曲學翻為弟子嘲離經徒守迂儒說作範如君負
出倫文從三變一朝新道傍散木猶蒙顧徑裏幽蘭併
沐春寄言和氏私相喜千載今逢辨玉人

佩蘭引謝友人惠香

星漢沈兮月華沒寂寞玄亭夜無色海上仙槎去不歸
夢中迷路常相憶美人尺素遠寄將玉函未啓先生香
謝家羅囊豈郁烈楚臣紉佩空流芳蘭麝何須煉寶鼎
芰荷早已凋金塘思昔吳宮爛如綺璇館娥媧鬪妍美
鑪內常燒百和花腰間不斷三薰蒞芙蓉帳暖籠茵光
薔薇樓高棄脂水裊裊輕烟飛四時藹藹香風度十里
那知麋鹿臺畔遊尚愛驪龍沫中死芝室猶途化有因願

把清香託君子

七夕嘆

朱明早謝清商變
衡紀年華逝如箭
新月初懸天上鉤
寒濤欲湧江間練
玉井輕銷桐葉聲
金塘細委蓮花片
嗚嗚不斷綠陰蟬
去去誰留紫泥燕
沙塞音書催擣衣
綵樓風物羞穿線
鏡中潘鬢飛素絲
篋內班腸裂紈扇
撫幙空房妾更悲
驅鞍遠道君應戀
試看星牛夜度綠
可怪人情重相見

陪都行

以上三首
幼時作

陪都八月夜氤氳名姬結伴遊
繽紛明珠為珮曳綵裙
臨風百和蘭
茵薰瑩篴輕調聲
遏雲當筵嬌舞歌
向君
君不見朝霞難挹日
易曛三五月
缺江水分何如
金尊美酒常在
手與君及時
聊樂員

皇甫司勳集卷十二

欽定四庫全書

集部

皇甫司勳集卷十三至

二十

詳校官監察御史臣曹坦

中書臣劉源溥覆勘

總校官進士臣朱鈐

校對官編修臣沈清藻

謄錄監生臣金維熙

欽定四庫全書

皇甫司勳集卷十三

明 皇甫汈 撰

七言古詩十七首

憶昔行寄徐公子

憶昔金陵高會時，東南王樹滿留司。
淮水橋邊看飲馬，石城門外待張帷。
白日陰霾不常好，衝飈激霧移蒼昊。
自信蛾眉肯讓人，誰知豺口橫當道。
黜陟徒聞吏部尊，

模稜頗笑尚書毫六七豪貴皆無恙二三賢雋翻凋喪

張翰歸來減宦情

謂張萊

顧榮死後嗟人望

謂顧璘

此時意

氣不能平慷慨先懷襍被情北海羞稱男子輩西州寧

避黨人名一朝聚散胡容易眼前得失須臾事酣飲莫

問黃公壚悲歌猶記荆卿市從來勢利不相和輸心安

用結交多牛首山中空歲月燕磯石上幾風波寄語翩

翩魏公子侯生別去奈愁何

金陵還客歌贈周以言

有客近自金陵還，言余特造竹林間。別日無多江上夢，
秋風忽改鏡中顏。彈缺悲歌橫義氣，班荆坐語都門事。
翻覆人情谿壑同，榮枯世態晨昏異。悠悠誰復為憐才，
落落何須久懷刺。君不見昔時江左重名流，一朝燼滅
隨荒丘。徒令戶外容雙戟，安用車前引八騶。青溪遙接
烏衣口，舊宅垂楊幾存否。陳遵那顧尚書期，阮籍惟耽
步兵酒。白首猶逢梁國人，傾心詎信平原友。歸去何如
謝世牽六關，不入最稱賢莫將。一掬羊曇淚灑向西州。

岐路邊

河湟行

傷曾公
號也

君不見高帝興師淨朔方我文親亦御戎行徵兵盡選
三河少校士爭收六郡良萬騎旌紛蔽日千羣組練
凜凝霜驃騎積弩號將軍耀武宣威志立勲陣前殺氣
驕難近幄內竒謀秘莫聞一朝受賑出蕭關百戰長驅
事馬鞍雪晦陰山乘夜襲天橫北斗向南看按轡俄傳
勞細柳飛書已報下臯蘭君王神武由天錫都護材雄

總無敵長戈大劔耀星芒畫仆旌旗夜奪壁鑿空開域
路應賒置亭列障遂踰沙博望從來能許國嫖姚自誓
不言家奏凱班師截海外共賀黃圖亘地界銘功刊石
紀龍飛解甲韜弓羅虎拜此時高會坐明堂登歌獻壽樂
無疆越雋探輸陳異物巴兪角抵盡來王世變堪嗟已
已間白登愁覩翠華還不聞更上金城畧但教常閉玉
門關王者之寶在土地辛苦成功可輕棄先皇遺却平
城憂謀臣徒守珠崖議百年慷慨有書生每過湟中氣

不平非求燕頤封侯易翻思馬革裹尸輕不識忌諱爾
何慙可憐身死名俱喪朱生肯訟伏波寃魏文猶寢中
山謗只今邊徼有烟塵寄言韓相好和親縱使分麾思
命將不知投筆竟何人

石河將軍歌

蜀人王戶
部詢乃翁

將軍書劍學俱成百戰長驅亦慣經羽角時時持候月
旄頭夜夜起看星曾宣威武驚巴檄欲樹功名向北庭
一朝解甲承平後萬事投壺飲美酒但教開筵撫孤松

誰復行營勞細柳道家多忌古來知隴西難封數本奇
為問藍田屏居日何如錦里賦歸時石河遙通古城北
少陵草堂猶自識舊說雄稱白馬間今來翻卧青羊側
郎君文藻子淵流耻居紈袴漢廷遊丹鳳俄傳肥寵詔
貂蟬還見出兜鍪街恩正值古稀年稱觴獻壽石河邊
河水長流石長在無須辟穀訪神仙

時錢謠

丁戊間吳中好行腐
錢乃采民謠而諷之

先王通貨興民利遂今圜法相更制周室曾聞九府開

漢京盡是三官隸小大品隨壯幼差輕重權兼子母倍
從茲鼓鑄何代無五銖半兩肉好殊不言改撰堪稱馬
却道能飛始號鳧我明稽古誇周漢上林往往緹朽貫
銅山禁弛盜詎亡穀雜愈多法滋玩爾來民風日偷薄
罔市吳趨行濫惡形如榆莢僅有文堵中緹環已無郭
三五持來乃當一百可僅寸萬盈索博徒爭取擲地殘
鬻夫手汙因風落生可使治神可通赤仄竒文空罷閣
官視民姦聽之便但遣黃金入私橐纖巧輕剽時共珍

木彊厚重將焉託君不見珠玉沉埋瓦礫全
鏤鋸為鈍鉛刀銛申椒久謝充幃後蟠木翻
容萬乘先古來棄置人同此何訝區區物亦
然

還硯歌為長兄賦

長公甲誕歲逢酉嘉賓四座稱觴後周郎手
持一片石殷勤為獻千金壽玉質溫瑩眼復
明霞彩爛耀鏗然聲主人拜受比瓊玩置之
几案烟霏生科斗古籀鐫虬形色絲妙句如
盤銘客從遠方羅雀至呼兒取出題鳳字

寶硯凋磨多苦辛
銀杯羽化須臾事
主方懊快客不歡
黑卿寂寞穎人棄
神物豈無呵護靈
依然得自吳趨市
君不見明珠合浦有
時還楚弓知在郢門間
由來喪焉何須問
且更籠鵝一解顏

秋日周山人見訪醉酒歌

自余還北山
惟堪卧南牖
掃軌何須長者通
著書已擬潛夫就
門題貴賤感
交情不逢親
舊話平生秋
水聞君臧舟楫
荒園一為款
柴荆此夕涼
風度虛幌少
焉微月

湛華楹開顏命醇酒潤耳發哀箏人世難并易別離試
從今日憶當時座上應劉成異物林中稽阮邀幽期末
路冥鴻翻折羽臨風華萼詎同枝清尊夜飲如辭醉明
鏡朝來視鬢絲

昔時行贈王亮卿下第之松江謁劉侯

昔時邂逅長安道下馬通名何草草今來會晤闔城傍
把劍語故俱茫茫問君何來西出秦拂君衣上洛陽塵
顏凋但使友人識金盡徒令妻嫂嗔君不見吳王宮闕

荒蕪久世事何如飲醇酒新月正照鹿臺花離心欲贈
華亭柳男兒快意須目前安用餘名潤身後蒲鞭為郡
有劉君驄馬風流迴不羣江上鱸魚逢正美客中鶴唳
更堪聞莫嗟失路無知己行見張華薦陸雲

出門行

君不見李生出門仰天笑仗劍直走長安道又不見蘇季
還家人盡輕敝裘再入咸陽城丈夫義氣橫雲海跼促
寧為轅下態白壁凋磨美益光黃金百鍊精還在身若

藩羊觸未安心同塞馬達能觀人情谿壑非云險世路
風塵本自難魏尚朝聞起代門夕看持節擁朱軒解道
聖明能使過須知感激為銜恩

俠客行席上贈吳子

臘月金陵有俠客雪中訪我長干陌雙樹初彫惠遠林
六花正覆袁安宅杯酒相逢總夙緣江山轉盼空陳跡
聞君明發廣陵遊淮水孤帆重倚樓二十四橋何處是
思心隨夢到揚州

壯歌行

君不見男兒生年二十好任俠落魄何曾問家業暫從
喪舍給吹簫肯向侯門坐彈缺相逢寒士解金裝悲歌
同醉酒壚傍上蔡總為牽犬地平津俱是鬪鷄場一朝
折節誦詩書三冬已足五車餘落筆言詞妙天下拔劍
義氣薄雲衢歲中超致大夫位才高奈取公卿忌報主
寧須顧一身使我但不登三事世情翻覆有波瀾崎嶇
蜀道未云難讒言興處憎蠅口峻法持來笑豸冠誤染

凝脂身遂枉徒抱憂心誰為諒摺溺猶可干秦君髡鉗
却是中郎將自古成功四序遷詎知倚伏有時旋仲文
枯樹非全死長孺寒灰亦復燃可憐禍福遞相因堪嗟
貧賤不相親安用先銜灞陵尉祇應長謝翟門人

酬孫子貽古鏡歌

美人貽我古明鏡月可擬形冰擬瑩拜受何如懷璧歸
相盼豈異投珠贈面拭銀華若發型背錯雕文恍難認
蟲蟠蚓結秀色斑博物云自開元間繩窮絨啓四座朗

整冠省帶愁人顏少年被服多冶艷盛飾入朝觀者羨
蛾眉詎知衆女嫉纖腰翻承後宮譴世途黥黯不堪陳
魑魅縱橫畫向人却詆林宗虛秉鑿爭言柱下只同塵
從此年華顛顛盡經月忘沐耻榮進映玉都非裴楷容
素毛漸改潘仁鬢君不見徐卿持節邁湘潯李生一鏡
價千金嘉惠慷慨情猶古短歌流傳稱至今媿我微才
響誰嗣荷君末光良自欽世交紛紛總如面何以報之
惟此心

觀拜月舞詞

金尊酒半銀燭低玉容娉婷始勝筭樂府翻成拜新月
當筵試為舞前溪麗從洛浦逢應駭媽使陽城笑定迷
纖腰乍動衣聊整巫女行雲暗窺影垂手却立身稍斜
西子臨江照浣紗香袖輕迴若飛雪石樓欲墜蘭芳折
紫匳滿地塵詎揚華簪四座纓俱絕同時女伴爭學舞
綽約妍姿誰獨數東素曾令餓楚宮裙皺偏能驕漢主
蓮花旋處婉龍游目馳鳧藻夜淹留若教嫁作盧家婦

快意今生莫解愁

虎丘贈別朱督學之閩

米君衡先
兄同年

五鹿談經謂絕羣一朝折角有朱雲
紕組儀曹咨典禮
承符閩越佇敷文路出汀漳百川會
水從星漢九溪分
遙辭燕闕過江來暫駐吳門訪鹿臺
祇樹秋紆使君節
慈燈夜引故人杯昔君召對承明殿
平原曾亦參嘉薦
班荆舊事那可論宿草交情今始見
人生塵跡本無常
一嬰世網更堪傷試問前因并後果
何言雌伏與雄翔

君不見生公說法超玄晤石壁猶聞鬼神護況是章縫
洙泗徒坐使絃歌遍儒素又不見吳國干將十戶珍靈
池千載淬猶新為向洪爐探劍術何似菁莪廣鑄人

貴竹道中贈別汪光祿

尚寧

憶昔走馬長安道與君看花並年少別來歲月那可留
老至風波已難料君銜新詔謁明光余始驅車入瘴鄉
曾記碧鷄揮手處願為黃鵠共高翔

默遊園歌贈李侍御

漢武雄圖歌底定西京得人號全盛蕭朱結綬羨同升
王貢彈冠許相慶建安才子數應徐陳阮同時託後車
清秋飛蓋追隨夜良燕哀箏潤耳餘我明中興逢聖主
海內賢豪盡羅取尚書門下期不來宰相閣東延始聚
共知舊事已更新誰謂今人莫如古李君文藻玉堂才
晚乘驄馬入蘭臺忽看西狩從遊日正值南閩奉使回
止輦故鄉宸眷久台君立拜荆門守後宮慣是妬蛾眉
滿朝况易傾蠅口拂衣一朝辭楚關思君萬里望蒼山

可憐素髮俱凋盡且喜清揚得再攀
柱下園居守淵默
邀我開尊坐泉石屈指交遊半不存
灰心勲業都堪釋
媿我蓬飄空歲年微官瓠落尚風烟
因君欲謁多羅偈
出却人間煩惱緣

雙劍歌題贈應二

中丞弟也相者云再獲
寶劍則貴矣果連得之

建安才子稱二應
干將鏌耶雙發矸
一朝操割登天府
萬里揮鋒靖炎土
季也韜精意氣雄
自同飛景處囊中
每夜拂霓看北斗
有時彈劍向秋風
憶昨工書謁金馬
裘

敝歸來客東野道逢異士笑且驚知君豈是悠悠者古
來神物遇亦鮮龍光再合猶堪羨函谷終符唐舉言豐
城却訝張華辨即今邊徼有妖氛好提三尺立奇勲贈
語王郎須感激功成為報呂生聞

皇甫司勳集卷十三

欽定四庫全書

皇甫司勳集卷十四

明 皇甫汈 撰

七言歌行

丁巳上元後二日吳純叔見訪留讌劇歡賦將進
酒屬余占和聊以嗣響

皇帝垂衣越三紀璇衡迴春履端始羽檄初停瀚海東
旄頭乍落吳宮裏三五才過明月期燈懸九華光陸離延

陵季子玉堂彥高乘駟馬黃金羈羅雀來尋玄晏宅卜
晝苦短繼之夕趙琴且莫彈秦缶亦暫息聽爾持觴歌
進酒主人起前為客壽憶昔召對天人書同時謁帝承
明廬弱冠自矜齊賈誼揮毫衆擬似相如眼中卿相可
立取海內賢豪無足數豈知世事有波瀾白首空嗟行
路難襍被東歸偃荒徑仰天西笑當長安君不見蘭膏
易銷圓景缺春光幾何芳草歇會須快意恣遊盤寧復
低眉受羈紲閉關頌酒託沉冥經月雖酣勝却醒封侯

未就填幽戶辟穀誰能謝漢庭

隣湖

君向明時學為圃不獨操贏稱善賈魚鳥相忘但一丘
江山信美非吾土分畦挿槿引清渠燕坐應憐抱甕餘
開尊自喜烹葵薦堆几聊看種樹書古來知有蒙莊叟
漆園似接芳隣後花時欲訪隱人居春水桃源迷渡口

贈章憲副之楚

滇池特秀五華山曾記南征萬里還江入岷峨天作壑

地經笮箐石為關肯憚風塵違壯志每談瘴癘一摧顏
當時六詔多賢守聲名無出臨安右郡中夷落半雕題
部下燹氓盡稽首君本甘泉奏賦才早從畫省擁麾來
高臥夜聞桴鼓息燕坐朝看畫戟開漢家佐理重循吏
遐徼迴翔占利器伏波慷慨讐百蠻潁川超忽登三事
今移憲節武昌西鸚鵡洲前芳草萋為傳崔顥題黃鶴
絕勝王褒訪碧鷄

上壽歌

憲使安子靜者余同榜友也今歲壬戌六旬始
週七月初度方期稱賀季氏上舍君貽書徵詩
為贈能敦愛矣遂擬古上壽歌一章奏諸樂府
登之壽域云

今皇纂歷稱元后坐令一世躋仁壽滿朝上公多耄年
在野逸人半皤首寶籙家聞東海謠金樽戶獻南山酒
君侯誕自惠陽神逸同崧嶽擬生申百年甲子纔週日
七月清秋初度長燕開河朔全消暑社結香山迴絕塵

簪綾履綦四座合管絃絲竹兩階陳魚鼈脰熊盤饌玉
沉瓜剝棗案羅珍攬衣更起前為祝盡道君侯備五福
不見闕下東方生但招海上安期屬衆賓就位余致詞
憶昔與君年少時運逢文教興弘館詔對賢良踐赤墀
仙班喜接彈冠盛郎署何嫌執戟疲英雄奮翼幸遭際
卿相策足可超致祇知忠蓋早垂勲豈料才華翻取忌
三命爭看獬豸尊萬里同為碧鷄使人生行樂歸去來
富貴榮名安在哉借問衡星朝待漏何如邀月夜銜杯

韋氏遺經堪嗣業
姜家大被況追陪
兄酬弟勸自年年
爾賞余敦池草前
既醉欲賡松柏詠
多情為賦棣華篇

五臺行贈陸儀曹

昔辛亥之歲余謫澶州時陸子光祖令濬任子
環今滑迄今辛酉十年矣陸以太夫人憂居偶

過吳門見訪命余作歌因賦

駐馬且勿辭問君何所之
開樽永今夕傾蓋憶當時
忘年北海非文舉為政東阿似子奇
官遷典禮朝趨省職

守文園夜侍祠君方用世晞時哲我已還山謝朝列覽
鬢不覺二毛侵彈指那禁十年別君家門閤人盡聞况
復兄弟邁機雲棲迹人間世游心物外羣山向五臺開
嶽色水從三晉引河汾昔時尚有任安在揮麈談兵氣
慷慨敢犯風波屢阡危寧知歲月不相待一朝功就身
已亡空留廟寢闔閭鄉陣望海營猶立幟碑存峴首但
霑裳男兒及時策足據要路如君高才豈同瓠會須施
澤濟蒼生安事呼雷守墟墓何顯貪佛宦情迂五峰深

處謁文殊鴻濛相見曾無語象罔歸來自得珠

河間二僧善笙管之伎寄居虎丘獲聞妙響子約

贈詩余遂同賦

山中面壁不知年江上乘杯共渡禪學得吹笙并弄管
隨時乞食了塵緣雙吹行過吳門市一聞清響驚人耳
急節繁絃不敢彈短簫長笛何能起單鳴散落雨花頻
合奏菩提別放春只疑給苑為邊塞却道祇洹是洛濱
生公石上千人坐慣愛新聲盡忘卧支籥希音豈易通

般遮瑞梵應難和由來絕伎世無倫誰當識曲聽其真
不逢妙解陳思輩幾作尋常捧鉢人

進酒詞

君不見北海尊罍夜不空能今千載懷英風又不見東
山聲妓日攜往曾是當年稱雅尚落魄余思同古人折
腰非願乞閒身清流奈取庸流笑傲吏翻遭俗吏嗔當
筵漉酒巾嫌濕隔箔傳歌衣畏貧酒酣耳熱起擊缶富
貴須時果何有呼盧一擲輕千金滅燭兩歡過五斗紅

顏成寵亦成妬白首相新詎相故莫作梁園苦上書安
用長門要買賦舊事寥寥空美談眼前齷齪更誰堪若
但低眉死牖下徒然生長在江南

送陸尚寶之京

昔日大廷召對策獨草萬言吐胸臆相君手捧頻歎嗟天
子親披動顏色御墨題名置上第賜秩蒙恩官建禮秋風
憶食故鄉蓴乞歸恥給長安米十年不調笑為儒一歲超遷拜
大夫朝持符璽超雙闕夜整衣冠別五湖隋隄柳暗落花稀

淮浦潮生舟似飛誰將筆硯先燒却可使才華讓陸機

太行道贈汪子之并州

君不見太行之阻當重關孟門中豁不可攀蚪峰千仞
跨海外鳥道百折盤雲間神功尚識五丁力穆幸猶聞
八駿還巉巉茲地危哉艱古來行者推心顏子獨何為
昧垂堂仗劍驅車走太行非因捧檄快毛義何莫迴馭
從王陽吁嗟乎人情丘壑未云險世事風波在轉眼李
陵臺上望鄉處襄子橋邊感恩去丈夫棄繻歸有期安

用牽衣苦留住

吳趨行

吳趨自昔稱嘉麗
畫棟雕楹傾甲第
陳粟流行充海陵
雜賄筒鞞溢廛肆
兩塘游舫載笙歌
十里娼樓結羅綺
津亭偃鼓晝不鳴
城門弛鑰夜無閉
刺繡非關卹緯憂
呼盧豈解談兵事
共道繁華景運開
寧知氛祲遞為災
矛鋌突入長洲苑
烽火燎起姑蘇臺
擊鐘連騎十萬戶
一夕化作咸陽灰
青眸沒虜塚
安在白骨橫野江
吞哀

命將出師聞受脤可憐名墮身亦殞桓桓司馬功最高鳥
盡弓藏翻構釁吁嗟往事勿重陳徙者稍復困稍振島
夷舉酒相慶飲眼輕中國為無人旃蒙夏五旄頭現御
史臺中傳羽箭風帆習險乘波濤霜簡宣威疾雷電材
官騶發躬秉麾甲士先登汗交練我軍遇寇屯三沙背
水列陣聊一戰提壺挈篋爭餉師農不易耕市不變夷
奴倒戈遂折北斬首千級日未昃血染鯨鯢海水腥氣
闕彪虎郊雲黑飛書奏凱獻明堂天子為進萬年觴金

繒大賚頒內府竹帛垂聲紀太常司勲作頌鑄貞石豐
碑我我海壖立父老覽之皆感泣舉頭但見長安日欲
往叩閤控天子借君持斧坐鎮此功成麟閣圖爾形御
史封侯自溫始

送吳尚朴北上拜官

黃河水開柳青色翩翩意氣辭鄉國玄成業本傳父經
靈運才堪述祖德男兒會須致身早鳴珂走馬長安道
彈冠憶昔多故人聽履今存幾元老莫因門第恥言勲

知有山公能薦君捧檄喜趨東省拜題書先報北堂聞
送李太僕還朝

余聞國君之富在數馬露臺雲錦何為者昔從周穆起
長鳴今逢伯樂因增價龍駒驃騎滿天閑苜蓿初肥漢
使還誰向王猷聊借問莫須拄笏看西山

梁園行送范學憲移官河藩

昔日梁王最好文別館多招作賦羣授簡花時進枚叟
含毫雪夜台鄒君竹下從遊聊戲水柳邊抽思總凌雲

一旦榮名安在哉後來特數鄴中才
魏陵西望空陳迹
漳水東流可重迴使君本出文正裔
繩祖常懷憂世志
慷慨欲勒燕然勲深湛豈尚雕蟲技
武林桃李半在門
會稽竹箭皆搜致移藩遙指伊澗瀍
停驂訪我吳趨市
閉關樓病謝通賓伏枕題詩贈遠人
君不見菟園銅雀
盡蕭條藻績雄圖共寂寥
相如倦作遊梁客
定自銜恩
入漢朝

子約庭中賞紫牡丹作進酒歌悼張子

人逢花下偏宜酒，況復名花世罕有。魏公園中擅品奇，
貴妃宮內傳名久。此種云自洛陽來，江左移將不易開。
纖纖映日新粧麗，裊裊臨風舞袖迴。珍重祇憐傾國色，
沈淪肯惜少年才。密友看花記昔時，張仲當筵亦太癡。
一曲強簪花調笑，百杯猶訴酒行遲。但見芳菲花不改，
空思鷄黍人何在。春風解道有時還，朝露寧知莫相待。
可因白髮恥看花，若箇朱顏得駐霞。兄弟謝庭多樂事，
世人徒數季倫家。

長干行送陸儀曹重補南署

長千里金鋪夾蘭朶陵樹蒼蒼控石城淮流湜湜通江
水廿年高臥東山廬一朝更踏西京市馬上耽遊期不
顧緩轡微吟日將暮都人觀者語道傍白頭何自始為
郎莫恨漢家今用少須看止輦拜馮唐

送阮將軍北上

阮侯才氣何翩翩少年志欲圖凌烟屏居一自藍田後
綠沈久卧蒼苔前祇知屈宋工題賦翻笑孫吳用兵誤

種瓜聊傍東陵門射虎忘却南山路君不見老驥雖伏
櫪長懷千里途李陵不歸豈國士魏尚復起誠丈夫我
有美酒傾玉壺飲君願奮千金軀功名會可收桑榆

皇甫司勳集卷十四